

## Gutut Ere Ibariwa

### 1:1-25 God Dim Dim Irawi Wan Wenasen

1-5 Wataget mek wataget iragen amba gan God kiman piup tan. Piup gapan dim da uon. God amun mega kaum aigantup wandeen. At irawi mum sisip megenat. Me anega wani, "At ganase wa," anega wan. At ganat tau aen. God ganat kakae yaweni yaua ganat dien. Mum sisip yan seni yaua sisip dien. Ame oam daiton. Me sia wan, "Kaum ge ae wanik irikup ge ao dot," anega wan. Irikup aigap at ameme yaua kiman dien. Ame oam derewa.

9-10 Me sia wan kaum arita ame at

daiton todagonen piup aroga tauen at  
darakaen.

11-13 Me sia wan gaian irawi gine  
ugup ugup oma irawi gine ugup ugup piupa  
yane tau amon. Irawi upi sia yanan. Ame  
oam yampoa.

14-19 Me sia wan oam siragam buanae  
tauan. Oam woup menan tan. Siragam buanae  
mum menan tan. Ap men piup irawi ganat den.  
Ganat maup bodu paua menan den sen. Ame  
oam degedeawa.

20-23 God sia wan meo irawi gine ugup  
ugup dim dim irawi kauma wenasen. Ameme  
upi upi sia yanan. Sia wan nenip irawi  
gine ugup ugup wenasen upi den sia yanan.

Ame oam nani yamunaetawa.

24-25 Sia wan man gine ugup ugup  
piupa ta wenasen. Wan mokare irawi wenasen  
piupa dim dim dararat yonane ine irawi  
wenasen. God irawi tani ameme orup sia se  
tau amon.

1:29-30 God wananan irawi tani taba  
den munen.

1:26-2:25 God apan tani guturewa

26-27 God apan tan. Oaen apan de  
tan. Me mek umap tamon.

2:1-25 God piup ware apan tan.  
Apan gine nokewa gapan goup daiton upuneni  
apan ao yon wanden. Apan yaua Adam dien.  
Nao arita weren amba Adam ware nao gapan

ae baraan. Kaum bunua at yaua Iden gapan  
nao arita tan. Oma daiton ap mepe egak  
yaumakap inak omaewa. Apan da napiwa ya  
boeta. Oma dawa anut omaewa. God Adam  
wadien, "Ge egak ma amat ta. Oma tawewa  
upi egaga nai. Go egak yaumakap anut  
omaewa wandia. Oma tawewa ame ya di na.  
Ge nawa bogitai," anega dien. Man man  
irawi piupa God tani ameme apan men tam  
onen Adam yaua diamon. God sia anega wan,  
"Adam megenat. Ma koerage. Ne oaen menan  
tain me wat agoaseta oaen mega antaneta,"  
anega wan. God Adam ware use baren aup  
boniga inen. Adam aup iniwandini God  
bembeni kaimewa daiton warupeni uewa sia

waboren. Bembeniwa daiton gapan warupe  
o~~ae~~n tan. Ewi Adam wa kandaseni God o~~ae~~n  
menan wat onen. Adam o~~ae~~n yaweni anega wan,  
"Ge ginan namuna umap. God bembenina  
warupe gapan tagen yauga o~~ae~~n diagian,"  
anega wan. Menan endi tamaru ine mamewa ae  
wemota o~~ae~~newa dere toboran ap dere daiton.  
God anega diamon, "Orup sean dim dim irawi  
anaeap enamon," anega diamon. Mu ni aroga  
g~~ue~~p uon gorogot uon umam ya anun. God  
dim dim irawi tani yawamoni irawi kakae  
iragen yawamon. Ame oam nani yamu  
daitonawa. God nao mega baware uon tani  
menan oam nani yamu derewa wagat wandeni  
oamewa. Oam ame wagat oame dien.

3:1-24 Oaenapan koe tanewa guturewa

1-7 Mokare anut aritawa. Me oaen anega wayawen, "God anega wadiaen go uon oma tawewa egaga ya nane?" Oaen gare anega wani, "Nu tawewa di nait go oma daiton tawewa egagawa nu ya nat wan. Wat nasetawa borit wait." Mokare sia anega wan, "Ae, ya borit wai. Nane nein kakaewa koewa iragi anuitamai. E God umap tanewa me gase anun," anega wan. Oaen oma tawewa yaweni megewa nat anun. Anuni wakuase nan tawewa yamu memewa wanen. Memewa nan boge tawe di yawan anun. Muk ingane ni aroga yawan. Oma baewa tambune guep gorogot muk waran panan.

8-21 Augaya God egaga ap aiwandin.  
Adam oaene de God oniwandin anune tap amon.  
Oma berip karaua wanumon. God wenamu wan,  
"E amba?" Apan gare anega wan, "Ne ununk  
kaga anun. Nin aroga menan tap tan karaua  
angen." God singui wayawen, "Da ame  
wadiagen? Oma tawewa gau wana ge naan?"  
anega wayawen. Adam gare wani, "Oaen mam  
nenaan ma tawewa nenenan." Oaenewa boge  
anega wan, "Mokare anu koeam nimanegen  
tawewa nan." God mokare dien, "Ap bagus  
yarewa gapan dururut ingan. Ne ap anega  
taina otuga oaen otua dere dum warain. Ge  
pusi nikirurup arai go me iagap togeta."  
God oaen wadien, "Orup seawa wege baware

anui. Go imuga memaga men anui me anap antapenageta." God Adam sia wadien, "Ame taan menan ne piupa gaian den genain. Nao kaimakewet taingawa taba naingai. Ge taingan amba bogitai. Ne piup gan tagen menan piup sia tai," anega wan. God man gure epi ge tawe taue guep gorogot pan munen. Adam oaenewa yaua Iwi dien me oaenapan irawi inewa.

22-24 Adam oaene dere nein kakaewa koewa anuitamen. Oaenapan inak omaewa tawewa napiwa yaibobot wanumoin. Inak omaewa ya napen menan God Adam oaene de watu enamoni. Watu enamoni me gopat nagirewa den sia watu enamoni inak omaewa



iap ambot wanumeen. Mu kereba muga nononga  
yangoane den. Adam oaene dere nao kakaewa  
garip amone dayup da ugup sia ton.

4:1-24 Kein Eiboro toni guturewa

1-24 Oam ewi Adam oaenewa tobot  
inane orup dere sen. Orup namu yaneni yaua  
Kein piup gapan nao taini otua. Ewiwa yaua  
Eiboro man amat taini otua. Oam da Kein  
taba tambu God garaet wanen. Eiboro man  
kaka mini tam gure God aigane tan. God  
Eiboro menan aton anun go Kein menan aton  
ya anun. Kein ugu ganganaeni God anega  
wadien, "Uguga ya ganganaep. Koewet ae we,  
anega wan. Pua wanumone Kein Eiboro ton  
boen. God Kein wayawen, "Goaniga amba?"